

Sermip erngullu avammut nioqutissatut atorneqarnissaat pillugu inatsisissatut (sermip erngullu avammut nioqutiginissaannut inatsit) siunnersuummut nassuiaatit.

Nassuiaatit tamanut tunngasut

1. Aallarniutitut nassuiaatit

Ukiuni kingullerni malugineqarpoq Nunatsinni sermeq imerlu avammut nioqutissatut atussallugu soqutigineqaleriartortoq. Namminersornerullutik Oqartussanut saaffiginnissutit assut amerliartorsimapput aammalu malunnarpoq saaffiginnissuteqartut pimoorussinerat annertusiartortoq.

Siuarsimanerpaavoq ingerlatseqatigiiffik Greenland Ice Cap Production Aps Narsamiit nioqutissiorlunilu avammut tuniniaalersimasoq serminik imigassanut akussanik. 1999-ip naanerani ingerlatseqatigiiffiup nioqutissiai pisisartunit ingerlatitseqqitartunillu pimoorussisunit Skandinaviami Europamilu niuerfinnut arlalinnut ilisaritinneqarput annertusiartornissaalu ilimanarluarluni. Ingerlatseqatigiiffiup nioqutissiai sunneeqataasussaapput sermip erngullu minguitsup Nunatsinneersup nunarsuaq tamakkerlugu ilisimaneqaleriartorneranut.

Davis Strødep illuatungaani akitsinni canadamiut ingerlatseqatigiiffiat Iceberg Industries Corporation ukiuni kingullerni nioqutissiulertiartuinnarsimavoq tunisaqaleriartorlunilu imermik, immiaaqqanik vodkamillu Newfoundlandip eqqaani iluliarsuit atorluarlugit. Ingerlatseqatigiiffiup nioqutissiai Amerikami Avannarlermi tunineqartarput Europamilu niuerfinni ilisimaneqaleriartorlutik. Ingerlatseqatigiiffiup pilersinneqarnerata takutippaa sermip erngullu avammut nioqutigineqarsinnaanerata qanoq periarfissaqartigisoq, tassa nioqutissiorneq, nioqutissianik pilersaarineq avammullu niuerneq paasisamaqarluartunit isumagineqarpat.

Ullumikkut soqutiginninneq saqqummereersoq isigigaanni ilimagineqarpoq ukiuni aggersuni sermip erngullu Nunatsinneersut nioqutissiarissallugit avammullu tunissallugit soqutigineqarnerat annertusiartussasoq kiisalu ungasinnerusoq isigalugu tamatumani suliffeqarfiit ullumikkornit annertunerujussuit pilersinneqarsinnaassasut. Aammalu tamatumani isigisariaqarpoq ilimagineqarmat ukiut arlallit ingerlaneranni nunani arlalinni imeq minguitsoq ullumikkorniit amigaataaneruleriartuinnassasoq.

Pissutsit taamaanneranni nalilerneqarpoq, inuutissarsiorfissaq taanna nutaaq ungasinnerusorlu isigalugu siunissaqarluartussaagunartoq pillugu inatsisiliortariaqartoq taamatut ingerlatsinissaq ullutsinnut naleqquttunik tunngavissaqartikkumallugu. Taamaalilluni pisariaqarpoq nutaamik inatsisiliornissaq, taamatut ingerlatsinermi inuiaqatigiit soqutigisaat qulakkeerumallugit, tamatumalu peqatigisaanik aningaasaliiniartut

periarfissikkumallugit aningaasatigut orniginartumik atugassaqaqlutik aallartitsisinnaanissaannut.

Naliliinerup tamatuma ilagaa, pisariaqartutut pingaartutut isigineqarmat nunatta sermimit imermillu isumalluutaasa niuernikkut nalingata attatiinnarnissaa qaffassarnissaalu, nioqutissiat pitsaassusiisa aamma nunat tamat akornanni niuerfinni tuniniaanerup ingerlaavarnissaasa qulakkeernerisigut, aammalu taakku inatsisiliornermi nutaami mianeralugit ilaasariaqartut.

Sermip erngullu atorneqarnerata aatsitassallu allat atorneqarnerata assigiissuteqarnerat patsisigalugu isumaqartoqarpoq pitsaanerpaassasoq sermimik imermillu inatsisip nutaap tunngavigissagaa aatsitassat pillugit akuersissuteqariaaseq ukiualunni atuutereersimasoq.

Inatsisissami taamaallaat pineqarpoq sermip erngullu avammut tunisassatut atorneqarnissaat pineqarnanilu sermip erngullu Nunatsinni pilersuinermit atorneqarnissaa, tamannami maannamutut aqunneqassammat imeqarfissatut isumalluutinik mingutitsinaveersaarnissaq imerineqartussamillu imeqarfiliornissaq pillugit nalunaarut nr. 9 15. april 1993-imeersoq naapertorlugu.

2. Inatsisissatut siunnersuummut tunngaviusoq

Inatsisissatut siunnersuummut tunngaviuvoq nunarsuatsinni imermik minguitsumik pisariaqartitsinerup annertusiartuinnarnera sulilu annertusiartussangatinneqarnera. Tamatumunnga takussutissat ilagaat misissuisimaneq Naalagaaffiit Peqatigiit qanittukkut nalunnaummik "Global Environment Outlook 2000"-imik saqqummiinerani, nunarsuaq tamakkerlugu ilisimatuut 200-t (nunanit 50-ineersut) aperineqarsimammata, nunarsuarput tamakkerlugu avatangiisitigut ajornartorsiutit pingaarnersiornerat pillugu. Misissuinermi avatangiisit pillugit ajornartorsiutini pingaartinneqarnerpaasut imatut nalunaarneqarput:

1. Silaannaap pissusiata allanngornera 51%
2. Imiinnarmik pissaaleqineq 29%
3. Orpippassuaajaaneq/inoqajuitsunngortitsineq 28%
4. Erngup imigassap mingutsitaanera 28%

Taamaalilluni ersarippoq erngup imigassap annertussusiata pitsaassusiatalu ajornartorsiutaanera nr. 2-tut 4-tullu nalunaarsuinermi inissinneqarsimasut, taamaalillunilu immikkoortiterisoqarsimanngikkaluarpat katillutik pingaarnarpaajussagaluarlutik.

Taamatut pingaarnersiuisimaneq tupaallaatissaanngilaq. Imeq minguitsoq nunani amerlasuuni amigaataavoq, sumiiffinnilu amerlasuuni imermik pilersuineq ilaneqartarpoq, imermik puiaasanut dunkinulluunniit immiussanik, ilaatigut pissutigalugu imeq pilersuutaasoq naammattumik minguitsutut isigineqanngimmat, imaluunniit imeq mamangippallaarmat. Amerlasuutigit aamma erngup salinneqarneratigut mamassusia peerneqartarpoq. Taamaattumik nunani arlalinni

erngup puiaasanut dunkinullu poorlugu tunineqartarnera ukiuni kingullerni 10-20-ni assut annertusiartorsimavoq.

Ilimagineqarpoq taamatut ingerlaneq ukiuni aggersuni nalingiinnassasoq, aammalu ilimagineqarpoq tamatuma kinguneranik periarfissaqalissasoq erngup minguitsup nunarsuarmi tamarmi niuerfínnut tunineqarsinnaanera periarfissaqalissasoq. Naatsorsuutigineqarpoq pigissaariartorneq ilutigalugu nalinginnaalertiunnassasoq imeq assigiinnigitsunik pitsaassusilik atorineqartassasoq aammalu pisisinnaassutsip ilaa atorineqartassasoq erngup nalinginnaasumit pitsaanerusup atorineqarneranut.

Kisiannili sermip erngullu Nunatsinneersup tunineqarsinnaanera puiaasanut dunkinullu immiussaannanut killeqassanngilaq. Ungasinnerusoq isigalugu nioqqutissatut niuerutigineqarsinnaasutut makkua isigineqarput, tamarmik immikkut nioqqutissiornikkut tuniniaanikkullu ineriartortittariaqartunik:

- Imeq Kalaallit Nunaanneersaq puiaasanut/qillertuusanut/dunkinut immiussa qíisalu sermeq Nunatsinni suliarineqareerluni poortorneqareerlunilu nunarsuaq tamakkerlugu imeruersaatilik niuerfínnut sammititaasoq (atuisussanut nioqqutissiaq).
- Imeq annertoorsuakkuutaarlugu umiarsuartigut angallanneqartoq assersuutigalugu araberit nunaannut imigassatut imaluunniit naggorissaanermi immitserutissatut atugassatut (suliffissuaqarneq siunertaralugu nioqqutissiaq).
- Sermeq imerlu nioqqutissiornermi atorsinnaasoq assersuutigalugu tipigissaasiornermi, elektronikkimi aamma imigassanik nioqqutissiorfíssuarni (immikkut nioqqutissiat).

Taaneqartuni tamani pingaaruteqarluinnassaaq erngup minguitsuunissaa, imaaginnanngitsoq nassiunneqalernerani, kisiannili aamma nioqqutissiat pisisussanut tikkipata, aammalu kingornatigut pisisut minguiissusianut nalornisinnaajunnaarlugit.

3. Inatsisitigut atuuttutigut tunngavíusut

Inatsisit maannakkut atuuttut malillugit sermip erngullu atorineqarnissaanni avammullu tunineqarnissaanni nalinginnaasumik tunngavíssaavoq Namminersornerullutik Oqartussaniit pisinnaatitsissutit pingasut pisariaqassasut:

- a) Imeqarfíssatut isumalluutinik mingutitsinaveersaarnissaq imerineqartussamillu imeqarfíliorneq pillugit Namminersornerullutik Oqartussat nalunaarutaat nr. 9 15. april 1993-imeersoq naapertorlugu imermik katersisinnaanermut pisinnaatitsissut. Nalunaarut taanna aqunneqarpoq Avatangiisinut Pinngortitamullu Pisortaqarfímmiit,
- b) Avammut tunisaqarsinnaanermut akuersissutinut tunngasoq pillugu Namminersornerullutik Oqartussat nalunaarutaat nr. 33 19. december 1985-imeersoq naapertorlugu avammut tuniniaanissamatut akuersissut. Sermip erngullu avammut tuniniarnissaannut tunngatillugu nalunaarut taanna Aatsitassaqarnermut Pisortaqarfímmiit aqunneqarpoq.
- c) Nunaminertat atorineqarnerat pilersarusiornermu pillugit Inatsisartut peqqussutaat nr. 6 19. december 1986-imeersoq naapertorlugu nunaminertamik atuinissamatut pisinnaatitsissut. Inatsit taanna Ineqarnermut, Attaveqarnermut Pilersuinerullu

Pisorta qarfirmmit aqunneqarpoq pisinnaatitsissutillu tunniunneqartarput
Pisorta qarfirmmit kommunalbestyrelsimiillu.

d) Suliffe qarfiit inuussutissaleriffiusut pillugit Namminersornerullutik Oqartussat
nalunaarutaat nr. 21 27. juli 1998-imeersoq naapertorlugu pisinnaatitsissut.
Nalunaarut taanna aqunneqarpoq Avatangiisinut Pinngortitamullu Pisorta qarfirmmit.

4. Inatsisissamut nutaamut siunnersuut

Taaneqareersutut isumaqartoqarpoq pitsaanerpaassasoq tamatumuunakkut inatsisip
nutaap tunngavigiguniuk aatsitassat pillugit inatsit, takuuk Kalaallit Nunaanni
aatsitassanik atuineq pillugu inatsit (aatsitassat pillugit inatsit). Tamatumunnga
patsisaavoq sermeq imerlu atorniarlugit isumalluutillu atorniarlugit suliffe qarfiit
assigiissuteqaqimmata, tassami taakkunani tamani sivisuumik
suliarinnittariaqartarmat, aningaasat amerlasuut annaaratarsinnaasat
pigineqartariaqarlutik kiisalu suliffe qarfirmmi immikkoortortani tamani
ilisimasaqassuseq annertoq pigineqartariaqarluni.

Sermimut imermullu tunngatillugu anguniagassaq tassaassaaq
nioqqutigiuminartumik nioqqutissiornissaq, akuerineqarsinnaasumik akilimmik
nioqqutissiarinissaa nioqqutissiallu niuerneramik paasisimasaqarlualuni
pilersaarutiginnissaa niuerfissanut pingaarutilinnut, pingaartumik Amerikamut
Avannarlermut Europamullu, allarpassuit taamaaqataanik pisisartunut
nioqqutissiortut unammillertigalugit. Taamaattumik aatsitassanut tunngasut
assigalugu pisariaqarpoq kajumilersinniassallugit nunanit tamanit
aningaasaleerusussinnaasut aningaasatigut ikiuussinnaasut, immikkut
paasisimasaqassutsikkut ikiuussinnaasut aammalu nunat tamat akornanni
pilersuisinnaanermik siaruartereqataasinnaasut, sermip erngullu annertoorsuarmik
suliffinnngornissaa ineriartortinneqassappat inuutissarsiornermi annertuumik
pingaaruteqalerluni.

Taamaattumik aatsitassarsionertut pisariaqartigaaq pisinnaatitsissutit (akuersissutit)
imatut ilusilersussallugit, taamatut suliaqarnermi inuiaqatigiit soqutigisaat
isumannaassallugit, ilaatigullu aningaasaliisut atugassaqartissallugit pilersaarutit
aningaasatigut orniginartunngortissallugit.

Maannarpiaq sukumiinerusumik ilisimaneqannngilaq taamatut suliaqarnermut
aningaasaliisussat kajumissaassagaanni pisinnaatitsissutini suut
piumasaqaataasariaqarnermut. Tamakkua ilisimaleriartugaassapput
aningaasaleerusuttut soqutiginnittut oqaloqatiginerisigut isumaqatiginiarnerisigullu.
Tamatumu peqatigisaanik piumasaqaatit piffissap ingerlanerani sukkasuumik
allanngoriartortittariarput, sermip erngullu Nunatsinni iluaqutigineqarnerani
niuernermit aningaasartuutinullu tunngasut il.il. allanngorarnerinut naapertuuttumik
sermip erngullu nunatsinneersup nioqqutissatut annerusumik minnerusumilluunniit
ornigineqarnerat ilutigalugu.

Taamaattumik aatsitassat pillugit inatsisip pissuseqataanik inatsisissatut siunnersuut
inatsisitut tunngavissiatut suliaavoq. Tamatumunnga taaneqareersutut tunngaviuvoq,
ukiuni aggersuni ilimagineqarmat sermip erngullu avammut nioqqutigineqarnerat

annertuumik ineriartortinneqartussaasoq, qularnanngitsumik teknikkimut niuernermullu tunngasutigut, aammalu maannamutut ilimagisariaqarluni inuiaqatigiinni annertuumik ineriartortoqarumaartoq. Taamaattumik pisariaqarpoq sermip erngullu tunngaatigut ingerlatat ataavartumik imminnut nalerisartuarnissaat inuiaqatigiinni ingerlaneq ilanngullugu. Tamatuma saniatigut ajornassaaq suulluunniit tamaasa ilanngullugit inatsimmi ataatsimi aqunniassallugit.

Taamaalilluni tunngaviusumik inatsisissatut siunnersuummi periarfissiiniarneqarpoq pisinnaatitsissutinik ilusilersuisinnaanissaq inatsisip iluani immikkoortortalersorneqarnerujussuarnik aalajangersagartalinnik aammalu ajornassanani pissutsinut immikkut ittunut allanngortunulluunniit naleqqussaanissaq. Taamaalilluni pisinnaatitsissutit (akuersissutit) ilusilersorneqarsinnaassapput, isumaqatigiinniutigineqartarsinnaassapput, tunniunneqarsinnaassallutillu inatsisip killissaarititaasa iluanni, taamalu imarisinnaassallugit pisinnaatitsissummi piimasaasut pilersaarummut aalajangersimasumut piffissamullu akuersiffiusumut naleqqussakkat. Tamatumunnga tunngatillugu pisinnaatitsissutiloriaatsit suliarineqassapput, aningaasalersuinissamut soqutigisaqartut oqaloqatiginissaannut tunngaviusinnaasut aammalu kingornatigut qinnuteqartut isumaqatiginiarnissaannut tunngaviusinnaasut.

Kisiannili aatsitassat pillugit inatsimmut sanilliullugu inatsisissatut siunnersuut arlalitsigut nalerisarneqarsimavoq, sermip erngullu atorneqarneratigut suliffiit qanoq ineriartorumaarnissaasa ilimagineqarnerat tunngavigalugu. Taamaalilluni aatsitassanut tunngatillugu pissutsit tamarmik, sermip erngullu atorneqarnissaannut avammullu nioqputigineqarnissaannut pingaaruteqartuunngillat. Tamatumunnga assersuutitut taaneqarsinnaavoq, inuiaqatigiit anguniagarimmassuk, Nunatsinni sermimik imermillu isumalluutit nioqputissatut naleqassusiat pigiinnarumallugu illersorumallugulu, sutigulluunniit pitsaassusissaq illersorniarlugu iliuuseqarnertigut qulakkeerinnissaq.

Sermip erngullu atorneqarnissaat aatsitassat pillugit inatsimmi ilaanngilaq aammalu Namminersornerullutik Oqartussat danskillu naalakkersuisuisa aatsitassat pillugit isumaqatigiissutaanni ilaanani.

5. Pisortat suliarinninnerat

Qinnuteqatit sukkasuumik, eqaatsumik ataqatigiiaakkamillu suliarineqartarnissaasa qulakkeerneqarnissaa siunertaavoq, sermeq imerlu pillugit sulissutiginiakkat pisortanit suliarineqarnerat "aqut ataaseq" atorlugu ingerlasassasoq. "Aqut ataaseq atorlugu" periaatsimiippoq qinnuteqartut pisorta qarfimmuut ataasiinnarmut saaffiginnissasut, taassumalu tamatuma kingorna suliariniarlugit kissaatigisat pisortanit tamanit suliarineqarnissaat ataqatigiiaassagaa.

Pisorta qarfiup ataqatigiiaarisussap qinnuteqaataa tigoreeruniuk, pisorta qarfiup isumagissavaa, pisorta qarfiit susassa qartut allat tamarmik suliasaq suliasamittut tigussagaat, malittarisassat atugassarisatik malillugit suliarissallugu. Pisorta qarfiit susassa qartut aalajangiineri pisorta qarfimmuut ataqatigiiaarisumut nalunaarutigineqassapput ingerlateqqitassatut. Inatsisissatut siunnersuut manna

malillugu pisinnaatitaanissamik akuerineqarnissamilluunniit qinnuteqartut tamatuma kingorna taamaallaat akissuteqarfigineqartassapput pisorta qarfiimit ata qatigiiaarisuusumit.

Sermip erngullu avammut tunisassatut atorneqarnissaanut qinnuteqaatini pisariaqartussaassaaq nunaminertamik tunineqarneq kiisalu peqqinnissamut avatangiisinullu tunngatillugu akuersissuteqarnissaq. Tamakkunatigut pisorta qarfiup ata qatigiiaarisuusup isumagisussaassavaa, pisorta qarfiit nunaminertanik tunniussinermut, peqqinnissakkut avatangiisitigullu piumasaasunut, avammullu nioqquteqarnissamut akisussaasut qinnuteqaatit tigussagaat, suliareriarlugillu aalajangiiffigissagaat. Tamatuma kingornatigut pisorta qarfiup ata qatigiiaarisuusup qinnuteqartoq pineqartoq akissuteqarfigissavaa, qinnuteqaataa qanoq akineqarnersoq pillugu. Pisorta qarfiit akornanni akisussaaffiit agguanneqarnerat atuuttoq malillugu qinnuteqaammi taamaattumi akuliunneqartussaassapput kommuni pineqartoq, Avatangiisinut Pinngortitamullu Pisorta qarfik, Ineqarnermut Attaveqarnermut Pilersuinemullu Pisorta qarfik kiisalu Aatsitassanut Pisorta qarfik.

Ata qatigiiaarilluni pisortatigut sulianut ilaasinnaapput malittarisassaliorneq, nakkutilliineq, nalunaarsuineq, nalunaartarneq akuersinermullu periusissat. Akuersinissamut periusissanut ilaassapput suliffeqarfiit atuiniartut timalimmik pilersaarutaasa tamakkiisut pingaarnerusutigut tunngaviusumik akuerineqartarnerat, ilaatigullu suliffeqarfiup immikkoortuisa ataasiakkaat akuerineqartarnerat, pisorta qarfiit allat attorneqartut kommunillu suleqatigalugit.

Sulinerup nakkutigineqarnera pisassaaq sumiiffimmu nakkutilliilluni orniguttarnertigut ilaatigullu pisinnaatitaassumik pigisaqartut pisorta qarfiimmut ata qatigiiaarisuusumut suliaq pillugu nalunaarutigisartagaasigut.

Siunertarineqarpoq Danmarkimi pisortat kattuffiillu isumaqatigiissuteqarfigineqartassasut Kalaallit Nunaanni immikkut paasisimasaqanngiffinni, tassami taamatut immikkut paasisimasaqarfiusumik pilersitsinissaq siunertarineqanngikkallarmat. Tamakkunnga assersuutitut taaneqarsinnaapput Avatangiisinut Nukissiornermullu ministereqarfiimmi suliffiit, tamatumani ilanngullugu Danmarks Miljøundersøgelser kiisalu Danmarks og Grønlands Geologiske Undersøgelser (GEUS) ukiini amerlasuuni Kalaallit Nunaanni sermimik imermillu misissuereernikut aammalu sermip erngullu avammut tunisassiarineqarnissaanut pingaarteqartunik annertuunik ilisimasaqalernikut. Tassami aatsitassat tungaatigut Aatsitassa qarnermut Pisorta qarfik aamma Avatangiisinut Nukissiornermullu ministereqarfiimmi suliffiit annertuumik suleqatigeereerput.

Aamma pisorta qarfiup ata qatigiiaarisussap suliassaasa ilagissavaat pisorta qarfiimmut akuersissuteqartartumut sinniisuussalluni qinnuteqartunut pisinnaatitsissutsimillu pigisaqartunut tunngatillugu kiisalu pineqartumut tunngatillugu periusissanik suliaqartassalluni, aningaasaliisinnaasut sassartinniassallugit, akuersissutini piumasaasut il.il. pillugit qinnuteqartut isumaqatiginiartassallugit, kiisalu akuersissutini piumasaasussat suliarisassallugit.

Pisortaqarfiup ataqatigiiaarisuusup aamma suliarisassavai pisinnaatitsissummik pigisaqartut sulinerannut tunngatillugu naatsorsuutitut aningaasanullu tunngasut.

6. Pitsaassutsimut tunngasut

Taaneqareersutut sermip erngullu annertuunngorlugu avammut nioqqutigineqarnissaani pisariaqassaaq annertuumik paasisimasaqarluartumillu niuerfinni tuniniaalluni pilerisaarinissaq, tassami nioqqutissiat taamaattut nunanit allaneersut unammilligassarujussuussammata. Sermip erngullu Kalaallit Nunaannersup unammillersinnaassusianut pingaarnerpaassagunarpoq nioqqutissiap minguiissusia, kisiannili akissaajaatinut tunngasut unammillersinnaanissamut annertuumik akornutaassagunarlutik. Taamaattumik taamatut suliaqarnerup ineriartortinneranut pingaaruteqartorujussuuvoq nioqqutissiat minguitsuunissaat, imaaginnanngitsoq usilersuunneqarnerminni, kisianni aamma nioqqutissiat pisisussamut apuunneranni, aammalu minguiissusianut pisisut nalornilinnnginnissaat. Tamatuma peqatigisaanik nioqqutissiat minguiissusiat nalilersorneqartariaqarpoq Europami Amerikallu avannaatungaani erngup imigassap nerisassatullu nioqqutissiat pitsaassusiannut sanilliullugu.

Nunatsinni sermip erngullu nioqqutissatut nalinganut - aalisakkanik nioqqutissiat assigalugit - pingaarutilerujussuuvoq nioqqutissiat taakkua minguiissusiisa attatiinnarnissaat pitsanngoriartortinnissaallu.

Tamatuma peqatigisaanik pisinnaatitsissummik pigisaqartumut sermip erngullu nunatsinneersup niuerfinni nioqqutiginiarlugulu pilerisaarutigineranut annertuumik aningaasaliisumut pingaarutilerujussuuvoq aningaasaliissutigisat nalikillisinneqannginnissaat, pisinnaatitsissummik pigisaqartup allap kukkuluttorluni imaluunniit qaninnerusoq isigiinnarlugu nioqqutissanik pitsaassutsimut piumasagaatinik naammassinninngitsunik pilerisaarinera patsisaalluni, taamaaliornermigullu kalaallit nioqqutissiaasa ataatsimut isigalugu isigineqarnerat annikillisarlugu.

Taamaattumik pisortat pisinnaatitsissummillu pigisaqartut assigiimmik soqutigisaraat, sermimik imermillu nioqqutissiat avammut tunineqartut pilerisaarutigineqartullu pitsaassusiisa isumannaatsuunissaat qulakkeersimaneqartuassasoq.

Tamatuma kinguneranik inatsisissatut siunnersuummi pitsaassutsit pillugit arlalinnik malittarisassiortoqarpoq, takukkit § 8, imm. 2, kiisalu §§ 12 aamma 21. Naatsorsuutigineqarpoq malittarisassat taakkua akuersissutini ataasiakkaani annertuumik annertusarneqarumaartut.

7. Namminersornerullutik Oqartussat ingerlatani taamaattuni peqataanissaat

Inatsisissami oqaatigineqartutut siunnersuut tunngaviusussaassaaq misissueqqaarnissanut pingaartumillu atuinissamut akuersissutinik ilusilersuinnissanut, annikitsualuttai ilanngullugit, piumasagaatit pillugit qinnuteqartut isumaqatiginiarneri aqutigalugit. Atuinissamut akuersissutini aningaasatigut

atugassarititat pingaarlutik soqutiginaateqassapput. Pingaartumik aningaasatigut piumasaqaatit tamakkua ilaatigut ilagisussaavaat akileraarutitigut piumasaqaatit assigiinngitsut, ilaatigullu ingerlatseqatigiiffiup Namminersornerullutik Oqartussanit pigineqartup peqataanissaa, taamaalillunilu suliffeqarfimmi akuersissut tunngavigalugu ingerlatsinermi peqataanineqarnissaa.

Namminersornerullutik Oqartussat taamatut peqataasinnaanerannut piumasaqaatissat aalajangersorneqarnissaat inatsisissatut siunnersuummi § 26, imm. 2-mi nalunaarsugaapput.

Tamatuma saniatigut inatsisissatut siunnersuummi § 22-imi aalajangersakkat allaqqapput, Naalakkersuisut pisuni ataasiakkaani aalajangertassagaat Namminersornerullutik Oqartussat peqataanissaat ingerlatseqatigiiffimmit sorlermit ingerlanneqassanersoq.

8. Pisortaqarfiit kattuffiillu il.il. tusarniaavigineqarnerat

Inatsisissatut siunnersuut ukununnga tusarniaassutigineqarpoq: Avatangiisinut Pinngortitamullu Pisortaqarfik, Ineqarnermut, Attaveqarnermut Pilersuinernullu Pisortaqarfik, Inuutissarsiornermut Pisortaqarfik, Kultureqarnermut, Ilinniartitaanermut, Ilisimatusarnermut Ilageeqarnernullu Pisortaqarfik, Akileraartarnermut Pisortaqarfik, Aningaasaqarnermut Pisortaqarfik aamma KANUKOKA.

Tamatuma saniatigut siunnersuutip inatsisilerituutut oqaasiliornera misissortinneqarpoq Inatsisilerinermut allaffimmut, Naalakkersuisut Allaffeqarfianniittumut.

Tusarniaanerni akissutit pisariaqarnera naapertorlugu siunnersuummut ilanngunneqarput.

9. Inatsisissatut siunnersuutip aningaasatigut allaffissornikkullu kingunerisassai

Soorunami siuningaaniit nalileruminaappoq inatsisip atuleqqaataani sermimik imermillu avammut tunisassamik aningaasaliiumallutik qinnuteqartut qanoq amerlatigiumaarnersut, kisiannili aallaqqaatigalugu ilimagineqarsinnaavoq periarfissaq tamanna soqutigineqassasoq.

Aallarnisarnermi pisortat suliarinninnerat maanna sulisorisat atorlugit ingerlanneqassaaq, taamaattumillu 2001-imut amerlanerusunik aningaasaliiffigineqarnissaaq qinnutigineqanngilaq.

Kisiannili sermimut imermullu tunngasut qanoq ineriartornerat apeqqutaalluni kingusinnerusukkut pisariaqalersinnaavoq aningaasanik amerlanerusunik pissarsinissaaq pisortat suliarinninnerannut suliassanullu taakkununnga tunngasut allanut atugassanik.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Aalajangersakkami pineqarpoq inatsit taamaallaat atortussaasoq sermip erngullu avammut tunisassatut atorineqarnissaanut tunngasoq.

Imm. 2-mi taaneqarpoq inatsit atortussaasoq immani avammut 3 sumilit tikillugit, tassalu tassani pineqarluni Kalaallit Nunaata imartaa, tassalu tassani pineqarlutik imaq sinerissamut qanittoq killeqarfiup aallaaviattut titarnerata iluaniittoq, imaq killeqarfiup avammut killinga tikillugu. Imartap avammut killeqarfia tassaavoq titarneq, imartap silissusiani titarneq sumiluunniit killeqarfiup aallaaviattut titarneranut qaninnerpaasoq. Kalaallit Nunaata imartaani ingerlatat inatsimmi pineqartut Namminersornerullutik Oqartussat aqussinnaavaat.

Imm. 3-mi taaneqarpoq inatsimmi pineqanngitsut sermip erngullu Nunatsinni pilersuinermit atugassatut atorineqarnissaat imaluunniit sermip erngullu erngup nukinga atorlugu nukissiornermit atorineqarnissaat, aammalu inatsimmi ilaanngilaq tamakkununga tunngatillugu misissuinissaq. Taamaalilluni tamakkuninnga suliaqarneq maannamutut inatsisit atuutereersut naapertorlugit aqunneqassaaq.

§ 2-mut

Aalajangersakkami taaneqarpoq sermip erngullu avammut nioqqutissatut atorineqarnissaat kiisalu tamatumunnga tunngatillugu misissuinerit taamaallaat pisinnaasut inatsit manna naapertorlugu akuersissuteqarnikkut. Taamaalilluni inatsimmi malittarisassani aalajangersarneqarpoq pisortat qanoq iliorlutik sermip erngullu avammut nioqqutigineqarnissaanut akuersissuteqartassanersut, tassani pineqarlutik misissueqqaarnerit (kapitali 2) aammalu atuinertit (kapitali 3) kiisalu pisortat ingerlatanik taamaattunik aqutsinissaat.

Imm. 2-mi nalunaarneqarpoq, naalagaaffik aamma Namminersornerullutik Oqartussat maannamutut imermut sermimullu tunngasunik ilisimatusarnermut atorineqarsinnaassunillu misissuisinnaasut nalinginnaasumik nunap assiliornerinillu nalunaarsuinermik. Misissuinerit taamaattut - pingaartumik Danmarks og Grønlands Geologiske Undersøgelsinit (GEUS) kiisalu suliffeqarfinnit Namminersornerullutik Oqartussanut pigineqartunit ASIAQ-mit Nukissiorfinnillu ingerlanneqartartut - maannamutut ingerlanneqarsinnaapput inatsit manna malillugu akuersissummik pinngikkaluarluni.

Aatsitassat pillugit inatsimmi taamatorpiaq aalajangersagaqarpoq.

§ 3-mut

Malittarisassami nalunaarneqarpoq, sermip erngullu avammut nioqqutissatut atorineqarnissaat siunertaralugu misissueqqaarnissanut Naalakkarsuisut pisinnaatitsisinnaasut.

Misissueqqaarnerit tassaagajuttarput aallaqqaatigalugu paasiniaalluni killilimmik misissuinerit. Taamatut misissueqqaarnerni nalinginnaasumik siunertaasassaaq pisinnaatitsissummik pigisaqartup aallaqqaataasumik naliliiniarnissaa atuinissaq siunertaralugu suliffeqarfimmik ingerlatsinissamik aallartitsinissamut periarfissanut tunngatillugu aammalu sumiiffiit assigiinngitsut piukkunnassusiat misissorniarlugu.

Naatsorsuutigineqarpoq misissueqqaarnissamut pisinnaatitsissut (§ 3 malillugu) tunniunneqartassasoq nunaminertami killilikkami, kisiannili pisinnaatitsissummi piginnaatitsissummik pigisaqartoq kisermaassisussaassanngimmat nunaminertap akuersissutigineqartup annertussusia pingaaruteqarpallaassanngilaq. Taamaattumik nunaminertaq akuersissutaasoq annertuukasiusinnaavoq. Nunaminertaq misissueqqaarnermi pineqartoq annikillisinneqassaaq, pineqartup ilaanut tunngatillugu kingusinnerusukkut atuinissamut pisinnaatitsisoqalerpat kisermaatassamik, tassami atuiiffiususaaq misissueqqaarnermi pisinnaatitsiffiusumit peerneqartussaassammat.

Misissueqqaarnissamut akuersissut sukumiinerusunik piumasaaqatitalerlugu tuniunneqassaaq. Siunertaavoq pisinnaatitsissutinut taamaattunut piumasat assigiit suliarineqassasut.

Taaneqareersutut misissueqqaarnissamut akuersissummi pisinnaatitaassummik pigisaqartoq kisermaassisussaataaannngilaq, taamaattumillu akornutissaqassanngilaq sumiiffik pineqartoq tamakkerlugu ilaannaaluunniit pillugu allat taamaaqataanik pisinnaatitaalernissaannut. Taamatut misissueqqaarnissamut akuersissutikkut aamma neriorsuutigineqanngilaq pisinnaatitsissummik pigisaqartup kingusinnerusukkut sumiiffimmi pineqartumi atuinissamut piginnaatitaanissaa salliutinneqarnissaaluunniit (§ 4 malillugu).

Misissueqqaarnissamut pisinnaatitsissummi piginnaatitsissummik pigisaqartoq kisermaassisinnaatitaanngimmat, killeqassaaq piginnaatitaassutip iluani qanoq annertutigisumik misissuisoqartassanersoq. Taamaattumik nalinginnaasumik pisinnaatitaassummik pigisaqartoq pisussaaffilerneqassanngilaq misissuinerit aalajangersimasut ingerlannissaannut.

Imm. 2-mi nalunaarneqarpoq misissueqqaarnissaaq ukiut tallimat tikillugit sivissuseqarsinnaasoq. Piffissap naanerani qinnuteqarnikkut misissueqqaarnissamut pisinnaatitseqqittoqarsinnaavoq.

Aatsitassat pillugit inatsimmi taamatorpiaq aalajangersagaqarpoq.

§ 4-mut

Aalajangersakkami nalunaarneqarpoq Naalakkersuisut sermip erngullu avammut nioqqutissat atorneqarsinnaanerannut pisinnaatitsisinnaasut. Atuinissamut pisinnaatitsissut taamaattoq immikkut sermimut imermullu tunngasuusinnaavoq.

Naatsorsuutigineqarpoq atuinissamut pisinnaatitsissut nunaminertamut aalajangersimasumut tunngasuusassasoq. Sumiiffinnut nunamiittunut tunngatillugu

pisinnaatitsisoqartassaaq kisermassassamik, akermanillu nalinginnaasumik sumiiffinnut immamiittunut tunngatillugu pisinnaatitsisoqartassalluni kisermaassassaannigitsunik.

Sumiiffinnut nunamiittunut tunngatillugu taamaalilluni pisinnaatitsissummik pigisaqartup nunamineq pineqartoq kisermaassarisinnaavaa. Taamaattumik sumiiffiup pisinnaatitsissummi pineqartup annertussusia aalajangerneqartariaqarpoq pisinnaatitsissummik pigisaqartoq sermimik imermillu isumalluutit suliffeqarfiup ingerlannissaanut pisariaqartut kisermaallugit ingerlassinnaaqqullugit, illuatungaaticullu nunaminertap annertussusia pisariaqanngitsumik akornutaasariaqanngilaq suliffeqarfiup taamaaqataata sumiiffinni allani aallartinneqarnissaanut, tamatumuunakkulluunniit suliffeqarfik unammillersoq pilersinneqassagaluarpat. Taamaattumik pisinnaatitsissummi tunngaviusumik malinneqartassaaq nunaminertaq aalajangersimasoq sermimik imermillu atuiffiginiarlugu pilersaaruteqarfiusoq, kiisalu sumiiffiit eqqaaniittut sermip erngullu atorneqartussat pilersaarutaasup pitsaassusiata illersorneqarnissaanut pisariaqartut.

Akerlianilli sumiiffinnik immamiittunik atuisinnaatitsinissami aallaavittut pisinnaatitsissum-mik pigisaqartoq sumiiffimmi pineqartumi kisermaassisinnaatitaassanngilaq, tassami ilulissat sermitut isumalluutitut atorneqartussat nunamiittutut uninngaannartuunngimmata. Kisiannili ilaatigut patsisissaqartarsinnaavoq immap ilaani aalajangersimasumi kisermaassisinnaatitsinissaq, taamaattoqartillugulu mianerisassat nunaminertani nunamiittunisut mianerineqartassapput. Immap aalajangersimasumik killilikkap kisermaaneqarsinnanerani pineqarsinnaavoq sermip iigartartup immamiittortaata atorneqarnissaa.

Atuinissamat qinnuteqaatit suliarineqarneranni Naalakkersuisut namminneq aalajangersinnaavaat akuersisoqassanersoq akuersisoqassannginnersorluunniit, akuersisoqassappallu suut piumasarineqassanersut. Taamaattumik qinnuteqartup piumasarisinnaanngilaa taamaattumik akuerineqarnissani, aammalu pisinnaatitsissummik pigisaqartup piumasarisinnaanngilaa akuerineqassaguni piumasaasut sionatigut akuersissutaasuni piumasaasut assigissaneraat.

Atuinissamat pisinnaatitsissummi tunngavissaavoq, atuinissamat pisinnaatitsissummik pigisaqartoq atuisasooq - imaluunniit suliffimmik atuisussamik aallartitsinissaq siunertarlugu pisariaqartunik misissuissasooq, tak. § 11, - taamaattumillu atuinissamat akuersissummi piumasaqaatit ilagissavaat, akuersissut atorunnaassasooq piginnaatitaassummik pigisaqartup piffissap aalajangersimasup ingerlanerani sumiiffik aningaasarsiutigalugu atuiffimmik pilersitsivinngippagu. Siunnersuutigineqarpoq piffissaliunneqassasooq sivisunerpaamik ukiut tallimat.

Piffissaliussaq imm. 2-mi taaneqartoq, tassa piginnaatitaaffimmik pigisaqartup sumiiffimmi aningaasarsiutigalugu atuilernissaq siunertarlugu periarfissanik misissuinissaa, aatsitassanik piaanissamat periarfissanik missuinissamat akuersissuteqartarnerup assigaa. Sermip erngullu avammut tunineqarnissaanut tunngatillugu taaneqareersutut misissuinissat sivikinnerunissaat

natsorsuutigineqarmat pisariaqarsorineqanngilaq piffissami pineqartumi piiaanissamut misissuinissamut immikkut akuersissusiornissaq.

Atuisinnaatitaanermut akuersissummi sumiiffiup pineqartup annertussusia apeqqutaalluni pisariaqarsinnaavoq, akuersissummi piumasaqaatinut ilanngutissallugu piffissap imm. 2-mi taaneqartup ingerlanerani sumiiffik akuersissutigineqarsimasoq qumartinneqassasoq.

§ 5-imut

Imm. 1-imi nalunaarneqarpoq pisinnaatitsissummik pigisaqartup atuinissamut piginnaatitsissummi tunngaviusumik piumasat makkua naammassissagai:

- a) pisinnaatitsissummik pigisaqartoq tassaassaaq piginneqataassuteqarluni imaluunniit aktiaateqarluni ingerlatseqatigiiffik Nunatsinni angerlarsimaffilik.
- b) pisinnaatitsissummik pigisaqartoq taamaallaat ingerlatsisinnaavoq inatsit manna naapertorlugu, aamma
- c) pisinnaatitsissummik pigisaqartoq ingerlatseqatigiiffinnut allanut ilanngulluni ataatsimut akileraaqataassanngilaq.

Imm. 2-mi aalajangersakkami aamma nalunaarneqarpoq piginnaatitsissummik piginnittoq suliffeqarfiup pilersaarutaasup ingerlannissaanut naammattunik piginnaasaqarlunilu aningaasateqassasoq. Tamatumunnga tunngaviuvoq suliffeqarfik tutsuiginartumik ingerlasinnaasariaqarmat aammalu pilersinneqarsinnaasariaqarmat suliffeqarfik ingerlalluortoq atasinnaalluortorlu, tassa sivikitsuinnarmik ingerlagaluariarluni unittuunngitsoq suliffeqarfimmut inuiaqatigiinnullu ajunaarutaanermik nassataqartoq.

Pisariaqanngilaq piginnaatitsissummik piginnaasassanik pisariaqartunik tamanik pisinnaasaqassasoq. Pisinnaasassat ilai siunnersorteqarnikkut pissarsiarineqarsinnaapput imaluunniit suliffeqarfinnik allanik suleqatiginissaannik isumaqatigiissuteqarnertigut, tamatumanili pisariaqassaaq pisinnaatitsissummik pigisaqartoq naammattunik aningaasaateqassasoq qulakkeerumallugu pisariaqassusia naapertorlugu pisinnaasat tamakkua suliffeqarfimmi atorineqarsinnaanissaat.

Piffissarititaasumi § 11-mi taaneqartumi, tassa atuinerup aallartinnginnerani, mianerisassat siuliini taaneqartut pingaaruteqarnerpaajunngillat, taamaattumillu saneqqunneqarsinnaassapput piffissami pineqartumi, tak. § 5, imm. 3.

§ 6-imut

Aalajangersakkami nalunaarneqarpoq, nunap ilaani aalajangersimasumi kisermaassisinnaatitaaneq, tak. § 4, akornutaassanngitsoq Naalakkersuisut sukulluunniit allanut piginnaatitsinissaannut inoqarfinni atugassamik imermik pilersuinissaq siunertaralugu. Kalaallit Nunaanni atorineqartussamik taamatut atuisinnaanissamut akuersissuteqartoqarsinnaavoq - §4 malillugu kisermaanneqarsinnaatitaasup iluani - pisinnaatitsissummik pigisaqartoq taarsiiffiginngikkaluarlugu. Tamanna ilaatigut piginnaatitaassummik pigisaqartumut

nanertuutaasumik akuliunnerusarsinnaavoq taamaattumillu taamaattoqassatillugu taamaallaat atorneqartassaaq. Naalakkersuisut isumaat malillugu patsisissaqarluinnaraangat. Pissutsinili allani sumiiffimmi piginnaatitsissuteqarfiusumi sermeq imerlu ima annertutigisassapput, piginnaatitsissumik pigisaqartup suliaanut inoqarfiillu pilersorneqarnerannut naammattorsuarnik peqassalluni.

§ 7-imut

Aalajangersakkami nalunaarneqarpoq, atuinissamut piginnaatitsisoqarsinnaasoq sivisunerpaamik ukiunut 30-nut. Aamma piginnaatitsineq sivisussusilerneqartariaqartoq ingerlatsinerup qanoq sivisutigissangatinneqarnera aammalu pisinnaatitsissummik pigisaqartup sivisunerusumik akuerineqarnissaminik soqutiginninnera mianeralugit, illuatungaatigullu pisortat soqutigisaat piffissap sivisuallaarneragut akornutaalinnginissaa mianeralugu, piginnaatitsinermut piumasaasut nunarsuaq tamakkerlugu sermip erngullu nioqutigineqarneranni pissuviusunut atuuttunut naleqquttumik naleqqussarneqarsinnaajunnaarlutik.

Tamanut tunngatillugu nassuiaatini taaneqartutut sermip erngullu tungaatigut annertuumik ineriartorneqarpoq, taamaattumillu pissusissamisuussaaq qulakkiissallugu piginnaatitsissutinut piumasaasut sukkasuumik allanngortikkiartortassallugit Kalaallit Nunaanni sermip erngullu atorneqarneranni niuernikkut aningaasartuutitigullu pissutsinut tunngatillugu allannguutit kingunerisaannik annerusumik minnerusumilluunniit orniginarsiartortillugit.

Imm. 2-mi nalunaarneqarpoq, atuinissamut piginnaatitsissut sivitsorneqarsinnaasoq, atuuffia naappat. Tamatumani piumasarineqarpoq, pisinnaatitsissummik pigisaqartup tamanna qinnutigissagaa piginnaatitaanerup naannginnerani aammalu pisinnaatitsissummik pigisaqartup piginnaatitsissummi piumasaasut atuuttut naammassisimassagai. Sivitsuinnissamik qinnuteqartoqartillugu suliarineqarnerani Naalakkersuisut namminnek aalajangersinnaavaat akuerissanerlugu akuerissannginnerluguluunniit, akuerigunikku aalajangersinnaallugu sivitsuinermi suut piumasarineqassanersut. Taamaalilluuni pisinnaatitsissummik pigisaqartup piumasarisinnaanngilaa sivitsuinnissamut akuerineqarnissani, aammalu piumasarisinnaanagu sivitsuineq pissasoq piumasaasimasut allanngortinnagit imaluunniit piumasaasut maannamut piumasaasimasunit pisinnaatitsissummik pigisaqartumut artornarnerussannginersut.

Imm. 2 malillugu sivitsuineq ukiut 30-t sinnerlugit sivisussuseqartussatut tunniunneqarsinnaanngilaq, tak. imm. 1.

Imm 1.-2 atuilluni ingerlatsinermut nalinginnaasumut tunngassuteqarput. Piginnaatitaanermi piumasaasut unioqquatinneqartillugit piginnaatitaaneq atorunnaarsinneqarsinnaavoq atorunnaarsitsinermut tunngatillugu aalajangersakkat naapertorlugit, tak. § 15. Atuilluni ingerlatsinerup unitsinneqarallarnernat tunngatillugu § 10 innersuussutigineqarpoq.

Aatsitassat pillugit inatsimmi taamatorpiaq aalajangersagaqarpoq.

§ 8-mut

Aalajangersakkami nalunaarneqarpoq atuineq aallartitsinnagu atortussallu pilersinneqartinnagit atulluni ingerlatsinermut pilersaarut tamakkiisoq (atuinissamut pilersaarut) pisortanut akueritinniarlugu nassiunneqassasoq.

Akuersinermi qulakkeerneqassaaq, ingerlanniakkat isumannaatsumik ingerlanneqarnissaat, ilaatigut teknikkimut, isumannaatsuunissamut, avatangiisinut pitsaassutsimullu tunngatillugu. Atuinissamut pilersaarutip akuerineqarnerata nalaani suliffeqarfimmuut tunngasut ataasiakkaat tiguneqarsimanngippata § 8 malillugu tamakkiisumik akuersinissamut tunngavissanngortinneqarsinnaavoq, suliffiup immikkoortuinut tunngasut tamakkua kingusinnerusukku akuerineqarnissaat.

Atuinissamut pilersaarutip pisortanut akueritinniarlugu nassiunneqarnerata nalaani nalinginnaasumik tamanna sioqqullugu atuinissamut piginnaatitsissut tunniunneqareersimassaaq (§ 4 malillugu). Taamaattoqartillugu atuinissamut pilersaarutip akuerineqarumannginneranut taamaallaat patsisaasinnaapput suliamut tunngatillugu mianerisassat ersarinnerusumik nalunaarneqarsimasut, tasaanerullutik isumannaatsuunissamut, avatangiisinut imaluunniit pitsaassutsimut tunngasut. Assersuutigalugu piginnaatitaassummik pigisaqartup atuinissaq pilersaarutaasoq pillugu atortussat nassiussai amigaateqarsinnaapput imaluunniit suliariniarlugit pilersaarutit ima nalorninaateqartigisinnaapput, pisortat isumaat malillugu pisariaqarluni pisortat akuersinissaannut tunngavissat naammatuunersut misissoqqinneqarlutillu nalileqqinneqarnissaat.

§ 8 malillugu akuersinissamut tunngatillugu pisortat suliarinninnerannut tunngatillugu atuinissamut pilersaarutit qanoq kinguneqarnissaannik pisortat naliliisinnaanerat pingaarluinnartuussaaq. Taamaattumik pisariaqarpoq pisinnaatitsissummik pigisaqartup ingerlanniakkap ataatsimut nalilernissaanut tunngavissanik peqarnissaa, matumani avatangiisinut tunngatillugu kingunissaanik nalilersuineq ilanngullugu.

Atuinissamut pilersaarutip nassiunneqarneranut ilanngullugu § 9-mi taaneqartoq atorunnaarsitsinissamut pilersaarut nassiunneqassaaq, pilersaarutit tamakkerlutik ataatsimut suliarineqarnissaat siunertaralugu.

Imm. 2-mi nalunaarneqarpoq atuinissamut pilersaarutip imarissagai suliffiup nioqqutissiaasa pisisussanut tunineqarnerminni qanoq pitsaassuseqarnissaat pillugu paasissutissat uppernarsaatillu, kiisalu suliffeqarfiup imminermi avammullu pitsaassutsimik qulakkeerinissaminut ingerlanniagai. Tamatumunnga tunngatillugu innersuussutigineqarpoq ataatsimut isigalugu nassuiaatini immikkoortoq 6.

§ 9-mut

Aalajangersakkami taamaallaat pineqarpoq atulluni ingerlatsineq tunngavissiillunilu pingaartumik avatangiisinut isumannaatsuunissamullu tunngasut isumagineqarnissaannut suliffiup uninneranut uninneratalu kingornanut tunngasut.

Imm. 1-imi nalunaarneqarpoq, atuinissamat pilersaarutip § 8 malillugu akueritinniarnermili - tamatumunngalu atatillugu - qinnuteqarnermi suliarineqassasoq nassiunneqarlunilu unitsitsinermi pilersaarut pisortat akuerisassaat.

Imm. 2-mi nalunaarneqarpoq, unitsitsinermi pilersaarummiissasut pilersaarutip piviusunnngortinneqarnissaanut isumannaatsumik pilersaarutit aningaasatigut qulakkeersimaneqarnissaa pillugu paasissutissat. Tamatumunnga atatillugu innersuussutigineqarpoq § 12, imm. 2 qularnaveeqqusiinissamat tunngasoq. Unitsitsinissamat pilersaarut Naalackersuisunit akuerineqassaaq.

Imm. 3-p imarai malittarisassat, unitsitsinermi pilersaarut ataavartumik nutarterneqartassasoq aammalu pilersaarummi allannguutit Naalackersuisunit akuerineqartassasut.

§§ 8-9-mi aalajangersakkatigut takutinneqarpoq pisariaqaleriartuinnartoq suliffeqarfinni pisuussutinik isumalluutinik atuisuni uninnermi avatangiisinut isumannaatsuunissamullu tunngasut isumagineqartarnissaat. Tamatuma pilersaarusiornera suliffiup aallartinneraniilli aallartittussaq tunngaviulluinnartussaavoq kingusinnerujussuakut uninnermi isumagisassat isumagineqarnissaanni suliassat pisariaqartut suliarineqarnissaannut, taamaalilluni aamma aningaasatigut pitsaasumik ingerlanneqarsinnaaniassammat.

Aatsitassat pillugit inatsimmi taamatorpiaq malittarisassaqarpoq.

§ 10-mut

Aalajangersakkami malugitinneqarpoq - pingaartumik nioqqutissiat akiisa avammullu nioqqutigineqarsinnaanerini pissutsit allanngorarnerisa kingunerisaannik - ukiut ilaanni atuneq ajunaarutaasarsinnaammat, kisiannili periarfissaqarluni pissutsit kingornatigut allanngorsinnaallutik, taamaalilluni suliffiup ingerlatallu unitsivinnissaat kissaatigineqarani.

Imm. 1-imi nalunaarneqarpoq, atuilluni unitsitsigallarneq Naalackersuisunit akuerineqassasoq. Tamatumani siunertarineqarpoq qulakkeerumallugu suliffeqarfimmut tunngasut, ilaatigut avatangiisinut, isumannaatsuunissamat aserfallatsaaliinissamullu tunngasut sapinngisamik allanngujaatsuunissaat suliffeqarfup uninngagallarnerani, aammalu uninnissamat pilersaarutit piviusunnngortinnissaat pingaaruteqartutigut annikillissanngitsoq. Kingulleq taaneqartoq pingaaruteqarpoq, kingusinnerusukut paasineqassagaluarpat - ilaatigummi taamaassinnaasassammat - suliffik ingerlateqqinneqassanngitsoq.

Imm. 2-mi nalunaarneqarpoq, Naalackersuisut pissutsini immikkut ittuni peqqussutigisinnaagaat unitsitsinissamat pilersaarut piviusunnngortinneqassasoq. Tamanna pisinnaavoq unitsitsigallarneq ukiunik pingasunik sivisussuseqarsimappat, imaluunniit unitsitsigallarnermi piumasaasut eqqortinneqanngippata.

Aatsitassat pillugit inatsimmi taamatorpiaq aalajangersagaqarpoq.

§ 11-mut

Aalajangersakkami nalunaarneqarpoq, atuinissamut akuersissummi piumasarineqarsinnaasoq, piginnaatitaassummik pigisaqartoq piffissap piginnaatitaaffiup aallaqqaataatungaani atuisanngitsoq imaluunniit atuinissaq siunertaralugu atortulersuutinik il.il. ikkussuissanngitsoq, taamaallaalli misissussallugit suliffeqarfimmik atuisumik pilersitsinissamut tassungalu tunngassuteqartunik periarfissaqarnersoq.

Tassalu pisinnaatitsissummik pigisaqartup piffissami tassani itinerusumik misissorsinnaavai sumiiffimmi atuinissamut periarfissat kiisalu atuinissamut tunngatillugu tuniniaanissamut aningasartuutinullu tunngasut allat. Piffissami tamatumani pisinnaatitsissummik pigisaqartoq sumiiffimmi pineqartumi kisermaassisuussaaq qularissanagulu atuinissamut piginnaatitaanissani misissuinerit inernerattut pisinnaatitsissummik pigisaqartup nalilerpagu akilersinnaasumik ingerlatsinissamut tunngavissaqartoq. Tamatuma peqatigisaanik piginnaatitaassummik pigisaqartup atuinissamut piginnaatitaanissamut piumasarineqartut tamakkiisumik ilisimassavai, taakkumi misissuinerit tunngaviusunut ilaasussaammata.

Taaneqareersutut atuisinnaanermut piginnaatitsissummum tunngaviussaaq, pisinnaatitsissummik pigisaqartup atuisinnaanermik misissuinissaa imaluunniit suliffeqarfimmik atuisussamik pilersitsinissamut pingaaruteqartunik misissuisimanissaa. Taamaattumik aalajangersakkami tunngaviuvoq misissuinerit piffissami pineqartumi ingerlanneqartut, § 11-mi aalajangikkat, naammattumik annertussusilimmik timitalersorneqassasut kingornatigullu pisortaqarfimmum suliamut susassaqtumut nalunaarutigineqassasut, tak. § 18, imm. 2.

Tamatuma saniatigut siunertaavoq piffissaq § 11-mi taaneqartoq sivisunerussanngitsoq piffissamit misissuinerit atorineqartussamit aammalu piginnaatitsissummik pigisaqartup tamatuma kingornatigut misissuinerit tunngavigalugit naliliinissaanik akilersinnaasumik ingerlatsinissaq tunngavissaqarnersoq. § 11 malillugu piffissaritinneqartussap § 4, imm. 2-mi taaneqartutut ukiut tallimat sinnersinnaanngilai.

§ 12-imut

Imm. 1-imi nalunaarneqarpoq sulinerup ingerlanneranut arlalinnik piunarsaqaateqartoqarsinnaasoq, pingaartumik teknikkimut, isumannaatsuunissamut, avatangiisinut, nunaminertanut, isumalluutitut pitsaassutsimullu tunngasunik. Tamatuma saniatigut piumasarineqarsinnaavoq piffissami akuersissutit atuuffiani pissutsit immikkut ittut pillugit nalunaaruteqartarnissaq kiisalu pissutsit avatangiisinut peqqinnissamullu pingaarutillit pillugit nalunaarsuisarnissaq. Taamatut nalunaarsuisinnaavoq piginnaatitsissummik piginnittoq akuersissummi tunngavissaritaasut tunngavigalugit, imaluunniit pisortaqarfik susassaqartoq nalunaarsuisinnaavoq pisinnaatitsissummik pigisaqartup akiligasaanik.

Taamaalilluni atuinnissamut akuerineqarnissamut piumasaasut ilusilersorneqartassapput suliap pilersaarutaasup suussusia annertussusialu mianeralugit aammalu mianeralugit akuersissutip isumaqatigiinniutigineqarnerata tunniunneqarneratalu nalaani suliffimmik taamaattumik pilersitsinissamut niuernikkut soqutigisat suuneri. Taamaattumik akuersinissamut piumasaasut ilusilersorneqartassapput pisorta qarfiup qinnuteqartullu akornanni isumaqatigiinniarnertit tunngavigalugit.

Piumasaqaatit tunngassuteqarsinnaapput suliffeqarfimmik ingerlatsinermut namminermut kiisalu ingerlatsinerup unereerneranut. Tassalu assersuutigalugu § 9 malillugu akuersissutip ilusilerneqarnerani piumasaqaatigineqarsinnaavoq suliffeqarfip unereernerani avatangiisinut tunngasut mianerineqarnissaat.

Imm. 2-mi nalunaarneqarpoq, §§ 3-4-mut tunngatillugu kiisalu §§ 8-10 malillugu akuersinernut tunngatillugu Naalakkersuisut pumasaqaasiorsinnaasut qulakkeerumallugu piginnaatitsissummik piginnittoq salinissanut atortullu piiarnissaannut il.il. naammattunik aningaasaateqassasoq. Piumasaqaatit taamaattut tassaasinnaapput piginnaatitsissummik piginnittoq aningaaserivimmi aningaasanik uninngatitsissasoq imaluunniit aningaaserivimmi qulaarnaveeqqusiissasoq imaluunniit aningaasartuutitut taamaattunut atugassanik aningaasat sukumiinerusumik amerlassusilikkat iluanni ingerlatseqatigiiffittut pingaarnertut qularnaveeqqusiissasoq.

Malittarisassaq taanna malillugu aamma piumasaasunut ilaasinnaavoq, piginnaatitaassummik pigisaqartup piumasaasunut ilanngullugu naatsorsuutigut immikkoortitsisarnissaa qulakkeerlugu aningaasat immikkoortitat ilumut suliffeqarfimmi pigineqarlutik uninngatinneqarneri qulakkeerlugit, taamalu salinissamut il.il. atugassatut piareersimallutik. Uninnissamut pilersaarummut tunngatillugu piumasarisat taamaattut atorneqarnerat akileraartarnikkut sunniuteqartussaammata pisuni ataasiakkaani Akileraartarnermut Pisorta qarfik oqaloqatigineqartassaaq.

Suliffeqarfimmut atuisuusumut tunngatillugu qularnaveeqqusiissutissat ilusilerneqassapput ilaatigut suliffeqarfik atuisorpiaq kiisalu ilaatigut uninnermi iliuuserissamaakkat annertussusiat qanorlu ittuunerat mianeralugit. Tamatuma saniatigut piumasaqaatit pisinnaatitsissummik pigisaqartup aningaasaqassusianut naleqqussartariaqarput. Kiisalu ilusilersuisoqartassaaq pisinnaatitsissummik pigisaqartoq oqaloqatigereerlugu.

Taaneqareersutut aalajangersakkami ilaatigut anguniagaavoq imm. 1 naapertorlugu piginnaatitsissummik pigisaqartup pisussaataffaaffimminik naammassinnissinnaanissaa qulakkeerumallugu piumasaqaateqarsinnaaneq, tamatumali peqatigisaanik suliap ingerlanneqarsinnaaneranut periarfissat annertuumik ajorseriartinnagit. Taamaattumik aalajangersagaq malillugu piumasaqaatit ilusilersorneqartariaqassapput uninnermi pisussaataffaaffit eqqortinneqarnissaat suliffeqarfiullu ingerlatsisup sapinngisamik naammaginartumik aningaasatigut tunngaveqarluni ingerlasinnaanissaa oqimaqatigiiaarlugit. Taamaattumik tamatigut naatsorsuutigineqarsinnaanngilaq imm. 2 malillugu

piumasaqartoqartarsinnaanissaata periarfissaqarnissaa pinngitsoorani aningaasatigut qulakkeerisoqarnissaa, uninnermi pisariaqartumik iliuusissat tamakkiisumik naammassineqarnissaat pillugu.

§ 13-imut

Imm. 1-imi nalunaarneqarpoq misissueqqaarnissanut atuinissanullu akuersissutini piunasaqaatitigut aqunneqartassasoq piginnaatitaassummik pigisaqartoq sumiiffimmi pineqartumi torersaajuarnissaa, eqqakkanik suujunnaarsitsisarnissaa il.il..

Aamma atuinissamut piginnaatitsissummi piunasaqaatitigut aalajangersarneqartassaaq sumilluunniit patsiseqartumik suliffeqarfiup uninnerani saliinnermut aamma atortorissaarutit akuersissut malillugu suliffeqarfiup atugassaatut ikkussorneqarsimasut piiarnissaat pillugit qanoq iliortoqassanersoq. Taamatut naggataarutaasumik saliineq aamma atortorisat piiarnerat il.il. saliinissamut pilersaarut § 9 malillugu suliarineqarsimasooq akuerineqarsimasorlu naapertorlugu isumagineqassaaq.

§ 14-imut

Imm.1-imi, § 6-imut atatillugu isigisariaqartumi, siunertarineqarpoq qulakkeerumallugu pisinnaatitsissummik pigisaqartup § 4, imm. 1 naapertorlugu atuinissamut akuersissummik pisimasup kisermaassisussaatitaanera pisariaqanngitsumik akornutaassanngitsoq sumiiffiup piginnaatitaaffiup iluani allat sermimik imermillu atuisinnaanissaannut.

Assersuutitut taaneqarsinnaapput illoqarfittut sanaartorfigineqartut aamma illut ataasiakkaat, nunaminertamiit imermik atuisut kiisalu tamaani nalinginnaasumik angallattut, matumani ilisimasassarsiorlut takornariallu ilanngullugit. Aamma aatsitassarsiorlutik suliffeqarfiit, aatsitassanik ikummatissanillu misissueqqissaartut paaasullu imermik tassangaaneersumik pisariaqartitsisinnaapput.

Tamatumani piunasaasut akuersissutini ataasiakkaani aalajangerneqartassapput, ilaatigut tunngavigalugu sumiiffiup pineqartup annertussusia sumilu inissisimanera.

§ 15-imut

Aalajangersakkakut periarfissinniarnearpoq, akuersissutini assigiinngitsuni akuersissutip annaanissaa utertinneqarnissaaluunniit pillugit sukumiinerusunik piunasaqaateqartoqarsinnaanera, ungerlatap sunaananut annertussusianullu naleqqussakkamik

Akuersissut annaaneqarsinnaavoq akuersissummi piunasaasut ilaattut aalajangerneqarsimappat pisinnaatitsissummik pigisaqartup akuersissut malillugu piunasaasunik naammassinninnginnerata kingunerissagaa akuersissutip ingerlaannaq atorunnaanera. Tamatumunnga assersuutitut taaneqarsinnaapput § 4, imm. 1-2-mi aalajangersakkat.

Akuersissummik utertitsineq pisinnaavoq akuersissummi piumasaasunut ilaappat pisinnaatitsissummik pigisaqartup akuersissummi piumasaqaataasunik unioqqutitsinerani Naalakkersuisut periarfissaqartut sukumiinerusumik piffissaliillutik akuersissut utertissinnaallugu, piffissaliussap naannginnerani pisinnaatitsissummik pigisaqartup akuersissummi piumasaasoq pineqartoq naamassisimangippagu.

Aalajangersakkakut qulakkeerniarneqarpoq, akuersissuteqarnermili isummerfigineqarsimassasoq akuersissut sunaluunniit patsisigalugu unikkaluarpas, aningaasatigut allatigullu pisussaataffaait akuersissut naapertorlugu pisinnaatitsissummik pigisaqartup pisussaataaffigisai pillugit qanoq iliortoqassanersoq.

§ 16-imut

Aalajangersakkami ersarissumik tunngavissinniarneqarpoq misissueqqaarnernut atuinissanullu akuersissutini aaqqiagiinngissutinik isumaqatigiissitsiniartarnerup malittarissioinnissaa. Tamatumani siunertaavoq aaqqiagiinngissutaajunnartut sukkanerusumik aalajangiiffigineqartarnissaat, isumaqatigiinngissutinillu isumaqatigiissitsiniartoqatigiit immikkut paasisimasalinnik inuttaqarsinnaanerat. Isumaqatigiinngissutinik isumaqatigiissitsiniartartoqatigiit kikkunnit inuttaqarnissaannik, qanoq oqartussaaffeqarnissaannik, suliamik ingerlatsinissaannik il.il. aalajangersakkat sukumiinerusut akuersissutini ataasiakkaani aalajangerneqartassapput.

§ 17-imut

Imm. 1-imi aalajangersakkat imaqarput, Naalakkersuisut piginnaatitsissumik pigisaqartup sulineranik nakkutiginninnerat tamatumunngalu tunngatillugu piginnaatitaaffii.

Piginnaatitaanernut allanut inatsisini allani nakkutilliisussaataarnermik tunineqarsimasutut assersuutitut taaneqarsinnaavoq kommunalbestyrelsit inatsisartut avatangiisit illersorneqarnissaannik peqqussutaat malillugu nakkutilliinerat.

Aalajangersakkami anguniagaavoq qulakkeerniarlugu, pisinaatitsissummik pigisaqartup akuersissummi pineqartumi malittarisassat piumasaasullu eqqortissagai.

Pisortap nakkutilliisuusup eqqartuussisunit akuerineqaaqqaarani imminullu ilisaritilluarluni nakkutilliartortarsinaanera nakkutiginnittariaqarnermik patsiseqarpoq. Nakkutilliineq tassaasinnaavoq misiligutissanik tigusilluni misissuilertorneq ingerlatseqatigiiffik ilisimateqqaarnagu, aammali tassaasinnaalluni aalajangersimasumik akuttussusilimmik misissuiartortarneq.

Imm. 2 periarfissiivoq, eqqortitsinngitsoortoqarsimappat pisortat saliinerit unitsitsinissamilu suliarisariaqartut ingerlassinnaagaat pisinnaatitsissummik pigisaqartup akiligassaanik aamma akisussaaffigisaanik.

§ 18-imut

Imm. 1-2-mi aalajangersakkaniippoq pisinnaatitsissummik pigisaqartup paasissutissanik nalunnaarusianillu allanik Naalackersuiusunut nassiussisussaataanera. Aalajangersakkami pineqarportaaq piffissaq pisortat atortussanik taamaattunik isertuullugit qanoq sivisutigisumik suliaqartarnissaat, kiisalu isertuussinissaq pillugu piumasaasut allat.

Aatsitassat pillugit inatsimmi taamatorpiaq malittarisassaqqarpoq.

§ 19-imut

Inatsisit atuuttut malillugit sermip erngullu avammut nioqqutissatut atornerqarnissaanut pisariaqarpoq pisortanit assigiinngitsunit arlalinnit akuerineqarnissaq. Taamatut ittumik ingerlatsiniaraanni nalinginnaasumik piumasarineqartussaavoq nunaminertamik atuinissamut akuersissummik tunineqarnissaq kommunimit pineqartumit imaluunniit Naalackersuisunit (Ineqarnermut, Attaveqarnermut Pilersuinernullu Pisortaqarfik) tunniunneqartussamik kommuni pineqartoq oqaaseqartereerlugu. Imernik katersinissamut akuersissut aamma pissarsiarineqartussaavoq Avatangiisinut Pinngortitamullu Pisortaqarfimmit aamma sermip erngullu avammut tuniniarnissaat pitinnagu akuersissuteqartussaavoq Aatsitassat pillugit Pisortaqarfik. Inuussutisserineq atuinissamiippat pisariaqarportaaq Avatangiisinut Pinngortitamullu Pisortaqarfiup pisinnatitsinissaa.

Aalajangersakkami nalunaarneqarpoq, Naalackersuisut aalajangersinnaagaat inatsit manna malillugu ingerlatat aqunneqarnerat ataqatigiiaarneqarnerallu pisortaqarfimmit ataatsimit akisussaaffigineqassasoq, naak inatsisitigut pisortaqarfiit allat oqartussaaffeqaraluartut ingerlatap immikkoortuisa ataasiakkaat aqunneqarnerannut atatillugu.

Aalajangersakkami siunertarineqarpoq periaaseq "one-door"-imik taaneqartartoq atorniarlugu. Periaatsip taassuma kinguneranik suliffeqarfiit sermip erngullu avammut tuniniarnissaanut akuersissummik qinnuteqartut pisortaqarfimmut ataqatigiiaarisumut taamaallaat qinnuteqartassapput, tamatumalu kingorna pisortaqarfiup taassuma isumagissavaa piginnaatitsissutit akuersissutillu inatsisini piumasarineqartut pisortaqarfinit allaniit tamaasa pissarsiarisassallugit. Taamaalilluni periaatsikkut tamatumuuna pisortaqarfiit akornanni oqartussaanerup agguarsimanera allanngortinneqanngilaq.

Aalajangersakkami Naalackersuisut piginnaatitaapputaaq inatsisissatut siunnersuutip iluani nalunaarusiornikkut sukumiinerusumik malittarisassiuutissallugu pisortaqarfiup ataqatigiiaarisuusup sulinini qanoq ingerlatissaneraa. Naalackersuisut nalunaarut taanna aqqutigalugu sukumiinerusumik aalajangersarsinnaavaat, pisortaqarfik inatsisissaq manna malillugu ataqatigiiaarisussa qanoq oqartussaaffeqassanersoq kiisalu ersarinnerusumik nassuiarlugu pisortaqarfinnut allanut ataqatigiiaarineq qanoq ingerlanneqassanersoq, tamatumani ilanngullugu qaqugukkut akissuteqartarnissaq aalajangersarlugu.

Pisortaqarfiup ataqatigiiaarisussap suliassai allat pillugit ataatsimut nassuiaatini immikkoortoq 5 innersuunneqarpoq.

§ 20-mut

Aalajangersakkami nalunaarneqarpoq kommunit attorneqartut oqaaseqartinneqartarnissaat misissueqqaarnissamut atuinissamullu akuersissuteqannginnermi, tak. §§ 3-4. Sumiiffiit kommunit aggornerisa avataaniittut pineqartillugit pineqartumi nunaqqatigiit siunnersuisoqatigiivi tusarniaaffigineqartassapput.

Aalajangersagaq § 6-imut § 14-imullu atatillugu isigineqassaaq, taakkua malillugit piginnaatitsissumik piginnittup saniatigut allat akuerineqarsinnaammata sumiiffimmi akuersissuteqarfigineqartumi sermimik imermillu atuinissamut.

Ilaatigut imermik imigassamik pilersorneqarnissap pilersarusiornissaanut pingaaruteqartoq iluanaarniutigalugu atuinissamut akuersisoqannginnerani kommunit nunaqqatigiillu siunnersuisoqatigiivisa attorneqartut oqaaseqartittarnissaat.

Naak § 6-imi periarfissaqaraluartoq pisinnaatitsissummik pigisaqartup saniatigut allat sermip erngullu sumiiffinni inoqarfiusuni atornissaannut akuerineqarsinnaanerannut, iluseritinneqartoq tamanna pisinnaatitsissummik pigisaqartumut annertuumik sunniuteqaratarsinnaasassaaq. Taamaattumik pitsaasuusaaq atuinissamik qinnuteqartup kommunillu attorneqartut sermimik imermillu atuinissamut pilersaarutaasa akornanni soqutigisat paarlangasinnaasut atuinissamut akuersissuteqartoqartinnagu sapinngisamik qulaajarneqartarnissaat.

§ 21-mut

Aalajangersakkami siunertarineqarpoq sermip erngullu inatsit manna malillugu akuersissutit atorlugit atorneqartup avammullu nioqqutigineqartup pitsaassusiisa assigiinngitsut immikkoortitersinnaanissaasa periarfissaqalernissaa.

Nalinginnaasumik nassuiaatini allaaserineqareersutut naatsorsuutigineqarpoq sermeq imerlu avammut nioqqutigineqarsinnaasasut assigiinngitsunik arlalinnik tunisassiaralugit, tassa tamarmik assigiimmik pitsaassuseqaratik taamalu assigiinngitsunik akeqarsinnaallutik. Taamaattumik pingaaruteqarpoq nioqqutissiat assigiinngitsunut immikkoortissinnaanissaat, tassa sapinngisamik pinngitsoorumallugu nioqqutissiat assigiinngitsumik pitsaassusillit paarlaattoortannginnissaat. Taamatut paarlaattuuisarnikkut pisinnaatitsissummik pigisaqartup allap tusaamaneqarluarnera tuniniaalluni pilerisaarinnermut nioqqutissianillu siammarterinnermut annertuumik aningaassaliissuteqarnikkut pilersikkiartuaarsimasaa akornusersinnaavaa.

Tamatuma saniatigut atuisussarpianut pingaaruteqartussaavoq takusinnaassallugu pitsaassuseq sorleq pineqarnersoq.

Tamanna tunngaviuvoq kissaateqarnermut uppersaasersuisoqartarnissaanik aaqquissuussinissamat, nioqqutissiat assigiinngitsut qanoq pitsaassuseqarnerat nalunaarlugu kiisalu atuisinnaanermut akuersissummi tamanna piumasatut ilanngunneqarsinnaassalluni.

§ 22-mut

Aalajangersakkami nalunaarneqarpoq, suliffeqarfimmik sermimik imermillu avammut nioqquteqartumik pilersitsisoqartillugu Namminersornerullutik Oqartussat peqataasinnaassasut § 26, imm. 2 malillugu, Naalakkersuisullu aalajangertassagaat peqataanermi tamatumani ingerlatseqatigiiffik sorleq peqataanermi isumaginnittuussanersoq.

Aalajangersakkami nalunaarneqarportaaq, Naalakkersuisut sukumiinerusunik malittarisassiorsinnaasut Namminersornerullutik Oqartussat taamatut peqataanerat qanoq isumagineqassanersoq. Tamatumunnga atatillugu aalajangerneqarsinnaavoq Namminersornerullutik Oqartussat peqataanerat ingerlatseqatigiiffimmut immikkoortumut nuunneqassasoq, assersuutigalugu ingerlatat taamaattut annertusippata imaluunniit imatut pissuseqalerpata pitsaanerussalluni ingerlatat tamakku ingerlatseqatigiiffiup ingerlataanit allanit immikkoortissallugit.

§ 23-mut

Aalajangersakkami nalunaarneqarpoq, akuersissummik allamut tunniussinerit tamarmik Naalakkersuisunit akuerineqartassasut, apeqqutaatinnagu toqqaannartumik toqqaannanngitsumilluunniit tunniussisoqarnerasut. Naatsorsuutigineqarpoq aatsitassarsiorneq assigalugu taamatut allamut tunniussisarnerit annikitsuunaviannngitsut misissueqqaarnerniit atuinissap tungaanut pissusissamisoortumik ineriartornermut ippinnanngitsumik ilaalersinnaallutik. Taamatut allamut tunniussinerimut tunngaviugajussapput aningaasalersuinerimut tunngasut.

Allamut tunniussineq pisinnaavoq toqqaannartumik tunniussinikkut, pisinnaatitsissummik pigisaqartup pisinnaatitsissummik pigisaqartumut nutaamut tunniussineratigut, imaluunniit toqqaannanngitsumik pisinnaavoq, tassa akuersissut immi allamut tunniunneqarani, kisiannili pisinnaatitsissummik pigisaqartoq tunniussinerim pineqarluni. Assersuutigalugu tamanna pisinnaavoq aktiaatit ilaasa tunniunneqarneratigut imaluunniit aktialiisoqarluni ima annertutigisumik tamanna ingerlatseqatigiiffimmut aalajangiisorujussuannngorsinnaalluni, imaluunniit isumaqatigiissuteqarneratigut taamatorpiaq sunniuteqartunik iliortoqarluni.

Aalajangersagaq aamma atorneqarsinnaassaaq piginneqatigiit arlallit akuersissummik peqatigiissut akunnerminni tunniussinerini.

Allamut tunniussinerimut atatillugu pisortat akuersineranni ilaatigut qulakkeertariaqassaaq, pisinnaatitsissummik pigisaqartup akuersissut malillugu pissusaaffiitut tunngaviusut tunniussinerup kinguneranik annikillinatilluunniit peerneqassanngitsut. Atuinissamat akuersissutinut tunngatillugu aamma

qulakkeertariaqassaaq suliffeqarfiup paasisimasaqartumik ingerlannissaanut kingusinnerusukkullu uninnissaanut tunngviusut tunniussinerup kinguneranik pitsaanginnerulersinneqarnatilluunniit peerneqassanngitsut.

Aalajangersakkap kingunerissanngilaa peqatigiit akunnerminni tunniussinerannut atatillugu piumasaasut pisortanit akuerineqarnissaat.

Imm. 2-mi nalunaarneqarpoq §§ 3-4 malillugit akuersissutit sukkulluunniit akiitsoqarfinit malersorneqassanngitsoq. Tassalu soorlu akuersissut allanit pingitsaaliissutigalugu akiliutigitinneqarsinnaanngilaq aammalu akuersissut akiliisinnaajunnaarnermut suliamut atasumut tunniunneqarsinnaanngilaq. Aalajangersagaq taanna pisariaqarpoq, pinngitsoorumallugu piginnaatitaaleratarsinnaammata § 5-imi aalajangersakkanik naammassinnissimannngitsut imaluunniit allatigut imm. 1-imi aalajangersagaq malillugu Naalakkersuisunit akuerineqarsinnaanngitsut.

Aatsitassat pillugit inatsimmi taamatorpiaq aalajangersagaqarpoq.

§ 24-mut

Aalajangersakkami nalunaarneqarpoq, suliffeqarfimmi misissueqqaarnissamut atuinissamullu akuersissutinut tunngasuni ajoqusiinernut taarsiinissamut akisussaaneq taarsiisarnermut malittarisassat nalinginnaasut malillugit pisartussaammata. Tamaalilluni suliffeqarfinni taamaattuni taarsiinissamut akissuusaneq pillugu immikkut aalajangersaasoqanngilaq, inatsisit allat atorlugit tamanna piumasarineqanngippat.

Imm. 2-mi nalunaarneqarpoq akuersissutini piumasarineqartassasoq piginnaatitsissummik piginnittup taarsiisussaataasutut akisussaaffeqassasoq sillimmatit allatulluunniit qularnaveeqqusiissutit aqutugalugit. Kingulleq taaneqartoq tassaasinnaavoq ingerlatseqatigiiffiup pingaarnernup qularnaveeqqusiinera imaluunniit aningaaserivimmi qularnaveeqqusiineq. Malittarisassaq malillugu aamma aalajangerneqarsinnaavoq marloqiusaassasoq tassalu silimmasiutit qularnaveeqqusiissutillu allat imminnut kattullugit.

Aatsitassat pillugit inatsimmi taamatorpiaq aalajangersagaqarpoq.

§ 25-mut

Aalajangersakkami nalunaarneqarpoq, sermip erngullu avammut nioqqutigineqarnerat pillugu ukiut tamaasa nalunaarummik saqqummiisoqartassasoq. Tamanna pisinnaavoq immikkut nalunaarusiornikkut imaluunniit taamaattunik sanasoqartarpat pisortaqaqarfiup ukiumoortumik nalunaarutaata ilaatut.

§ 26-mut

Imm. 1-imi 2-milu aalajangersakkatigut nalunaarneqarpoq, Naalackersuisut periarfissaqartut atuinissamut akuersissummi aningaasatigut piumasaasut piumasanut ilanngussinnaallugit. Aningaasatigut piumasaasut taamaattut tassaasinnaapput akileraartarnissamik piumasaasut assigiinngitsut, ilaatigullu tassaasinnaalluni Namminersornerullutik Oqartussat suliffeqarfimmi atuinissamut akuersissuteqartumi peqataanissaat. Tamanna aatsitassarsiornermi piumasaasartut assigaa.

Soorlu imm. 1-imi nalunaarneqarpoq, atuinissamut akuersissummi piumasaasinnaasoq pisinnaatitsissummik pigisaqartup akileraartitaasarnissaa. Akileraartit tamakkua soorlu makkuusinnaapput:

- a) Sumiiffiup akuersissuteqarfiusup annertussusia tunngavigalugu ukiumoortumik akiliteqartarneq (nunaminertamut akiliummik taaneqartartut);
- b) nioqqutissiornerup annertussusia aamma/imaluunniit naleqassusia tunngavigalugit akiliut (nioqqutissiornermut akileraarummik taaneqartartoq).

Akileraartit tamakkua saniatigut piginnaatitaassummik piginnittoq akileraartussaataavoq akileraartarneq pillugu inatsit sukkulluunniit atuuttoq naapertorlugu.

Imm. 2-mi nalunaarneqarpoq, atuinissamut akuersissummi piumasarineqarsinnaasoq ingerlatseqatigiiffik Namminersornerullutik Oqartussat pigisaat suliffeqarfimmi akuersissummik peqartumi peqataasinnaassasoq. Ingerlatseqatigiiffiup Namminersornerullutik Oqartussanit pigineqartup peqataasinnaanerata assigaa, Nunatsinni uuliasiornissamut kisermaassisinnaanermut akuersissuteqartarneq ingerlatseqatigiiffik naalagaaffiup aamma Namminersornerullutik Oqartussat pigisaat Nunaoil A/S aqutugalugu, aamma taassuma assigaa naalagaaffiup Danmarkimi peqataasarnera aqutugalugu DONG Efterforskning og Produktion A/S (siornatigut DOPAS-iugaluartoq) aqutugalugu.

Aatsitassarsiornerup tungaatuulli Namminersornerullutik Oqartussat peqataanissaanni siunertaavoq, ilaatigut taamatut ingerlatsinermi paasisimasaqarlualernissaq, taamalu inuutissarsiummut taamaattumut piginnaaneqarlualernissaq, ilaatigullu suliffeqarfiup iluaniit aalajangiinernut sunniisnaalernissaq, tassa pisinnaatitsissummik pigisaqartup oqartussaasui aqutugalugit.

Namminersornerullutik Oqartussat peqataanissaanni piumasaqaatissat qinnuteqartumut isumaqatigiinniutigineqartussaassapput atuinissamut akuersissummi piumasaqaatinut tamakkiisunut ilanngullugit. Ilaatigut tamatumani pineqarput akuersissummi peqataassutissap annertussusia taamalu ingerlatseqatigiiffiup atuilluni ingerlatsinermi ingerlatseqatigiiffiup Namminersornerullutik Oqartussanit pigineqartup suliffeqarfimmi atuisuusumi peqataanerata annertussusia, kiisalu taamatut peqataanermi ingerlatseqatigiiffiup aningaasalersueqataanissaa.

Allatigut § 22-mut nassuiaatitit innersuunneqarput.

Akileraarutissanut aamma Namminersornerullutik Oqartussat peqataanissaannut tungatillugu pineqarput, ajornanngippat inuiaqatigiinnut iluaqutaasinnaasunik angusaqarnissaq, kisiannili tamatumani apeqqutaassapput atuinissamut suliniuterpiaat suunersut aammalu qinnuteqartut isumaqatiginiarneri, tamakkunuunatigummi takuneqarsinnaalissammat sakkussat taamaattut qanoq atorineqarsinnaatiginersut.

§ 27-imut

Aalajangersakkami nalunaarneqarpoq, misissueqqaarnissamut atuinissamullu akuersissutitut sullissinermut akiliutissanik aalajangiisoqarsinnaasoq. Sullissinermut akiliutit taamaattut aalajangerneqarsinnaapput akuersissutip nalunaarutigineranut imaluunniit sivitsorneqarneranut imaluunniit akuersissutip allamut tunniunneqarneranut kiisalu pisortat akuersissutip suliarinerani annertunerusumik suliaqarsimatillugit.

Imm. 2-mi nalunaarneqarpoq, taamatut akueritinniarluni qinnuteqaatip nassiunneranut sullissinermut akiliuteqartitsisoqarsinnaasoq.

Imm. 3-mi nalunaarneqarpoq, sullissinermut akiliutit tamakkua atorineqartassasut pisortat taamaattunik suliaqarneranni aningaasartuutitut matusissutissat ilaattut. Aammalu aalajangersakkami nalunaarneqarpoq akiliutit tamakku aalajangerneqarsinnaasut aningaasartuutitut tamakkiisumik ilaannakuusumiluunniit matussutissatut.

Aatsitassat pillugit inatsimmi taamatorpiaq malittarisassaqarpoq.

§ 28-mut

Aalajangersakkami siunertarineqarpoq ingerlatanut inatsit manna naapertorlugu akuersissuteqarfiusunut tunngatillugu arsaarinnittoqarsinnaasoq.

§ 29-mut

Aalajangersagaq malillugu inuit inatsisitigullu inunnut naligiissitaasut akiliisinneqarsinnaapput.

§ 30-mut

Aalajangersakkami imm. 1-imi nalunaarneqarpoq, sermeq imerlu pillugit inatsit atortuulissasoq 1. januar 2001-imiit.

Imm. 2-mi nalunaarneqarpoq, sermip erngullu avammut nioqqutigineqarnissaannut akuersissutit suliarineqartassasut inatsit manna malillugu, tassa maannamut kalaallit nioqqutissiaannik avammut tuniniaanissamut akuerineqarneq pillugu Inatsisartut peqqussutaat tunngaviginagu.

Imm. 3-mi nalunaarneqarpoq, pisinnaatitsissummik pigisaqartut suliarisimasaminnik angusaminnillu nalunaartarnerat pisortat ingerlatsineranni paasitinneqarsinnaatitaaneq pillugu Inatsisartut peqqussutaannut ilaanngitsoq. Tamatumunnga patsisaavoq nalunaarutit isertortuummata.

§ 31-mut

Aalajangersakkami imm. 1-imi nalunaarneqarpoq, sermip erngullu avammut nioqqutigineqarnissaannut akuersissutit inatsisip atulernerani atuutereersut atuutiinnassasut taamaallaat inatsisip matuma kinguneranik allannguuteqarlutik.

Imm. 2-mi nalunaarneqarpoq, sermip erngullu atornissaanut avammullu nioqqutigineqarnissaannut qinnuteqaatit inatsisip atortuulinnginnerani suliarineri naammassineqarsimanngitsut pisortaqaarfimmit susassaqaartumit ingerlateqqinneqassasut inatsimmi matumani malittarisassat malillugit.